

憺

園

文

集

憺園文集卷第二十二

序

四

顏光敏書義序

前輩毗陵唐襄文公少以制義知名其宦成後所作天下尤奉爲準格今所流傳吏部時藁是也闕里顏脩來先生亦官吏部自公之暇著近藁若干篇以示予予惟國家旣以制義取士即人臣所以選德報國者於是乎在而欲定人之賢否必其於文之工拙文之工拙不易辨也常進新而習故足以囊括大典網羅衆家而後可能也苟通籍以

還悉心簿領遂以雕蟲忽之是忽國家之制而不復以人材爲計矣觀襄文公集中荅俞教諭書君子之用心何其遠哉先生之著近藁也體大而思深豈徒賢於無實駁雜之說予有以知其必能長育人材陶鑄萬類也若其意度波瀾視襄文公直可方駕值今右文之世方將助成德教以鼓勵天下予故推而論之以與當世賢士大夫相勗焉

韓元少制義序

代

唐承六代文章之敝昌黎獨爲古文於舉世不爲

之日人以起衰之功歸之而公之文在當時自習
之持正諸君子而外實未有共尊信以變其所爲
者至宋歐陽文忠輩始推以爲正宗而師之耳歐
陽子之時亦當宋世文章之敝公獨取古文於舉
世不取之日人以起衰之功歸之然其知貢舉時若
省元李實其文亦無大名於後蓋始取其正而才
或未足以厭天下而變其所爲故一時譁然夫習
俗之於人豈不甚哉苟非時之所尚爲之難求之
亦不易有其人而不相遇固無益也若夫文章之
道至廣要使學足以深其義理而言足以達其性

情雖千彙萬變皆正也士衡云雖濬發乎巧心或受嗤於拙目世所驚眩以爲奇者自有識者視之大抵文所當然而已乃若其高下之故亦可得言韓子之時天下習爲對偶聲律其害也浮誇而失實歐陽子之時鉤章棘句其害也詭固而不情至於今之世則又異矣影響其義絲綴其音雷同其辭灰滅其氣羣瘖而衆瞽日朘而月削不至於澌盡不止故以視唐宋之敝則高下又有間然夫世豈無負才之士可以爲古人之所爲者哉而謂不如是不足以得功名也韓子元少獨確然其不可

拔當其爲文其心無所不入又浸淫乎百氏而發
爲要眇之音朱絃疏越一唱三歎極其致宜可以
感鬼神而致風雨然莫不適合乎聖賢之道而止
癸丑南宮之役予與大學士杜公少司寇姚公學
士熊公實司厥事旣受命皆秉心一志務得天
下特立之士不爲習俗所靡而能以其學黼黻大
業一起當世之衰者庶以副我

皇上右文之治旣而得第一人發其名則韓子也
予聞韓子自領京兆薦以來世已咸知其文而獨
多以奇目之者夫韓子亦猶是文之當然而已世

之下也乃更以當然者而謂之奇則其病爲甚而韓歐之時殆不至然也今韓子旣以省元入對大廷

天子賞其文親擢第一韓子之遇可謂至榮而其文章可以自信矣子旣喜韓子之能爲是文而又幸其適遇乎聖世亟求古學之日蓋有非偶然者焉故以序其集而告天下之讀韓子之文者

翁寶林稿序

四民之業其三者皆有必然之效故農不盡其力無倖獲於天工不盡其技無苟售於人唯商得以

廢居擅利然亦盡其術者能之至於士則不然其所爲學問無從而知也知之於其所爲之文而已文之塗至不一而其取富貴也又往往不皆有本之學得之夫人之情亦孰不樂其苟且而近於得者乎故不特古學之廢也於所謂時文之中則又相戒曰無自苦若某某者其文卑其取一第若操券而責焉某某之文其理其氣吾未見其善也今居華廡焉吾若是是亦足矣萬夫同聲唯下之求幸而果得則益自信其說以教其子弟即不得不以爲操業之陋而曰吾如是世猶不識焉若今之

某某者其又近之矣此其道類以學爲賈而非其術嗟乎朝廷於四民之中懸官方以取士將以治夫三者而操業之陋乃更出其下文章之習不盡爲芻靈不止故昔之患在文體不正而今之患非患不正也患其與夫向之不正者而俱盡也患其似正而枵然其無有者也此其始皆倖得之心爲之雖然文以應科目而曰爾無務得焉則不足以信然則如之何曰吾亦爲其必然之效而已必然之效者何也文有理實備其理者不爲形似而取之題之左右逢其源文有氣真能養其氣者取於

心而注於手若江河之流而不可竭理與氣相輔而文之道盡矣則翁子寶林之文是也夫天下烏有盡其道而不得者哉農之於其力工商之於其技術皆有必然之效而況於文以是爲正則誠正以是爲得則無不得讀翁子之文而信其道人之情又何苦不爲必然而顧倖其偶然者乎嗟乎若翁子者可以救時矣

禮部頒行房書序

往予與韓慕廬同官學士寓直閣中相與言及文章風氣

天子雅意振興儒術使文明之化光被天壤而士
且狃於科舉之習雷同勦說徼倖苟得而無奇偉
俊拔者出其間思欲少更取士之制畧近古意其
後予副貳春卿乃與長屬斟酌定其式第一場試
經義兩三篇經疑三四篇折衷於注疏章句集注
與諸儒之解又略仿宋慶曆間歐陽文忠公之議
所謂寬其日限隨場去留之法第一場去若干人
留若干人次試二場又去若干人留若干人次試
三場慕廬又言第二場增律賦一首其判用唐人
體設爲疑獄以觀其所比之條則去留必審而士

知務實學既具稿將上之而公卿間有以蘇氏設法取士不過如此爲言者遂不果上時時去來於心而不能釋茲者吾師孝昌公起爲大宗伯遂復以是質之先生曰何必爾也三試之制內聖外王備之矣人自不肖盡心耳即以經義言之君向者丙辰錄真之選其於文章之言趨論之詳矣使天下士皆尋繹其說則於雷同勦說之患十可去其七八也會予墮馬抱疴閉門五十日方取新進士之文而評次其高下先生遂取以頒示寓內使鏤板印行夫由丙辰以至於今天星一終士之移於

風會與能自立者其所業皆當少變矣若夫吾所
論文章之旨趣雖更數十年豈得而變哉然吾又
有說於此天下有一定之規矩繩墨而無一定之
方圓平直也或有問予作科舉之文宜何如者予
必告之以傳注爲根柢以古文爲依歸以先正爲
準的請益焉則告之曰傳注者非一師之說也自
漢唐宋元明以來諸儒之異同宜考訂也又非以
決張乖誕爲古文也非以腐爛迂拘爲先正也學
古文者當知其用筆之不類於今人學先正者當
知其結撰之不類於後人如是焉而已矣然其道

非可襲而取也先正華亭唐文恪公訓子弟一歲之內必閱十三經史記兩漢三國資治通鑑文選韓柳諸家文集語錄諸書爲文必三百首蓋自春徂冬幾無一刻得暇逸如是數年學乃有成予童子時見爾時先達尚能通曉三史誦習韓柳歐曾文集又討論王唐歸胡制義立言皆有根柢今人但守兔園冊子以爲弋獲之資叩之枵然無有也每爲憤懣太息學者由吾今日之云以參說諸十二年前之說而因執是集以求其合與否庶幾乎當世有奇偉俊拔者出焉而力去夫雷同勦說之

習也則科舉之式誠可以不變而吾孝昌公所爲嘉惠後學之意亦大矣哉

陸子載翁林一合稿序

舉業之敝至今日已極其故在求得而患失喜逸而惡勞苟且因循趨逐時好羣然相習以成風靡然而不知所底有賢且智者焉不以得失撓其懷窮年矻矻弗顧世俗之訾訾言而覃精研思於其中則其學問識解及文章尺度必能深造乎古人之域而一時文體亦因之以變如以衆人皆然我何爲獨異其甘居於下士之至愚而舉業之敝壞又

誰起而救邪吳門陸子予載爲予兄弟總角交虞
山翁子林一則山愚先生令嗣執經於予者也二
子與蘇子苞九翁子寶林相友善所處至阨窮獨
能沈研鑽極深求聖賢之指歸務爲通經博古明
體達用之學一時或姍笑之不顧也亡何寶林爲
予壬子所錄丙辰第二人及第苞九以乙卯雋京
兆子載林一則又同登丁巳賢書而嚮日姍笑之
者又從而歎羨欣慕之不置由此言之人患不能
立志耳誠能覃精研思以從事於斯雖不以得失
嬰其懷究亦未嘗不得而詭隨者亦未必盡得也

苞九子載林一行將試南宮掄大魁本其學問紆其蘊抱古人所謂騁駉驥於千里仰齊足而並馳諸子不多讓矣茲以予載林一合刻其稿問世請序於予爲述之如此

宋嵩南制義序

戊午秋江南鄉試榜發哀然舉首者爲廬江宋子年甫弱冠都人士相與歎羨或又言宋子之兄先一年丁巳亦舉於鄉矣復相與歎羨不已宋子謁予於長干僧舍摳衣肅拜執弟子禮甚謹已而出其行卷屬予序其首予讀之而歎曰文章天地之

元氣得之者其氣直與天地同流茂隆鬱積薰爲
太和夫豈偶然哉宋子以終賈英妙之年稟機雲
藻麗之質其爲文理醇詞雅法古調高玉立霞舉
含章秀發直將關衆俊之口而奪之氣吸先正之
脈而得其神於世之翫奕熟爛卑恭勦襲之習邈
乎不相及也然使宋子經奇自命絕倫逸羣遂足
驚爆鄉國凌蹕長老或規規揣摩徒以博一日之
遇士之所以自爲者亦輕而宋子恂恂粥粥欲然
如不勝其文章茂隆鬱積之氣隱見於眉目間可
以知其器識之遠且大矣由是而大魁天下雍雍

廟堂固分內事吾知宋子亦不以自滿假也士君子所以立於斯世者當自有在君家元憲景文兄弟文章事業彪炳古今他日大小宋之名近在廬江而竊念世俗之相與口呿目瞪歎羨不已者又何如也予方編輯禮經支離視息愧未有以相長是在宋子勉之而已

王令詒制義序

宋文憲有言古時文學之彥自童丱誦習四經三史期於默記後遍觀歷代之史以廣其知識而又參於子書集錄探幽索微使無遁情此學所以精

瞻宏博足爲經濟之用也自貢舉法行學者知以摘經擬題爲志四子一經之箋是鑽是窺餘則漫不加省蓋貢舉之弊其來舊矣朱子嘗欲合諸經子史時務分之以年每三年而分試之治經者必守家法答義者必通貫經文嗚呼使朱子之法行烏有此失哉然而績學好古之儒未嘗聊爾苟可爲貢舉之學震川先生嘗言今所學者雖曰舉業而所讀者即聖人之書所稱述者即聖人之道所推衍論綴者即聖人之緒言無非所以明脩身齊家治國平天下之事而出於吾心之理昔賢之

爲學蓋皆博而有要也是故貢舉之法即不變未
始不可以得真才戊辰南宮試予與宛平相國諸
公同事務得精瞻宏博有體有用之士雖其才分
大小不同然亦往往而遇青浦王子令詒少孤露
不以貧困廢學童穉時即好爲古文辭有聲梅邨
先生極嘉賞之吾鄉葉文敏公嘗過青浦歸爲予
言令詒之才於今溯其時越二紀矣而令詒始得
舉於京兆成進士今雖猶壯年然其得名甚早贈
蹬棘園久而始遇噫亦可謂艱哉予觀令詒爲人謙
退自持有至性其文閎深淹雅根於性理不名一

家要其大指以震川爲歸震川古文爲一代宗師而尤邃於經術故其制義元元本本言軌於道一切才人學士皆不能及令詒湛深古文固已有素又嘗受業於平湖陸先生性命之學經其指受宜其文之類震川也始令詒不得館選諸公卿咸爲歎惋予獨以爲人文之傳不傳固不繫此向所欲得精贍宏博有體有用之士豈以名位爲重輕者哉令詒釋褐後予留之邸舍日夕與之講貫切磋蓋其學日進而未有已也其文予旣論定三十餘首刻之錄真選中又遴其可存者百篇都爲一集

刻以行世而又序之如此

山東行卷序

今與入五都之市百物具備其中精粗美惡無不見而瞭然者燕趙楚粵相距千萬里其取舍究亦無大懸絕雖操奇贏者欲逞其智巧以逐利而有所不能蓋天下物之不齊者終不能漫無區別紛然雜進而人情不甚相遠即五尺之童適市物之精粗美惡指而示之或能知之者其弗至於顛倒蒙霧也明矣惟以文章取士則不然作者之心思學問閱者或不能知就其一日之所見以爲高下

非若市司之物可以權衡而平準有不虞而得之者有懷才而負屈者變易蒼素淆亂是非僥倖者居之不爲恥而有志之士搢腕太息無可辨訴此其故在司衡不得其人宋人所謂謬種流傳者也苟有深心斯道者於此如歐陽永叔呂伯恭朱晦翁王伯厚虞伯生丘仲深李賓之王濟之張太岳黃葵陽諸公舉子文章之工拙猶凡物之精粗美惡確乎有品第一見瞭然非難知者而如其眯目任情率意以從事珍蕭艾於篋笥謂蘭蕙之不香其不爲五尺之童所笑者幾希翁編脩寶林偕高

戶部紫虹校文山東所得人甚盛寶林選定行卷
百餘篇寓書示予喜其識鑒之精而冀望他時之
主文者於此取則也爲刻而序之

戊辰會墨錄真序

戊辰春試士南宮宮傳宛平公司馬成公副憲鄭
公與予同奉總裁之命時朝廷用臺臣之言
得稍緩榜期從容校閱鎖闈者垂三十日始得竣
事及榜發都下良翕然稱爲得士蓋宮傳公與成
鄭二公之藻鑑不爽而濟以同事諸賢之殫其心
力宜予之得藉手以迄成也顧予自惟才識淺劣

謬荷

主上殊遇代匱諸司所不至墮越是懼惟是精白
一心虔共奉職庶幾得仰副我

皇上所以委任之至意入闡之日宮傳公與二公
抗聲言曰往者壬子京闈之役公實爲主司風氣
自此丕變今茲南宮之試天下才雋聚也公其勉
之予拱手對曰憶壬子到今十有六年學殖本薄
年衰益荒幸隨元老鉅公後秉承指導敢不黽勉
從事遂告誓神明設立規條與同事者約諸士三
年攻苦劇賢鉅肝就此盈尺之紙苑枯得失決於

俄頃卷一到時即宜袖手閣筆冥心靜對恍與作者之神情相遇然後隨其工拙而上下之若是則雖限於功令美不悉收而在吾與彼之心亦可以無憾矣若掀紙未竟妄先甲乙逞臆恃才塗抹恣手此不特坐失作者之苦心而上負功令明誅鬼責何可逭也其程約以讀書窮理養氣爲文章之根柢故其粹然成一家言者尚矣鏤金錯采之觀而中無生氣未敢錄也其雷同勦說者屏矣輝山媚川之姿而中有累句不輕棄也觀其敷辭必求切理觀其才勝必求入格理非株守訓詁之

謂也必其能旁通曲暢於聖賢之旨其理足者辭之高下無不如意矣格亦非拘牽繩墨之謂也必其能神明變化於矩矱之中其格定者才之正變入焉而化矣以故一字之得失參詳或至數時一卷之去取商量或至累日苟得佳文洞心駭目踊躍賞歎其稍有疵類者咨嗟沈吟反覆紮量至於二三場並所加意證明家法則一經不爲少條畫時務則連牘不爲多振幽滯於獨絃竊渺之中標奇雋於風塵物色之外黎明據案夜分方退積日勞憊嘔逆大作兩目發腫愛我者勸以少休雖心

感其言意不能自止也所幸諸公於予持論多所
相同予輩雖自信其心之無負而尤恐識力有限
無悞收而或不免於悞落者則此心怵怵至今猶
未能釋然也榜定即於闈中刻元魁十卷其餘今
復訂定之以公海內豈敢謂文章風氣畢歸是科
亦以志宮傅公與予輩之盡心於是云爾

葉元禮制義序

士之以文章雋南宮也每科凡累百人其間或以
年或以才名家世並足顯於時而兼之者什不一
二焉弱齡擢第而聲實未厭人望一也窮年積日

苗畬畊穫於其中僅工揣摩之文叩以古學而色
變二也拔起單寒家風漫無足紀有松柏生埤之
歎三也此三者有一於此雖或幸而得遇吾知其
中之嘽嘽而不能釋也乃柳玘以少年高第才名
太盛門望清華謂之不幸以人生之所難兼而反
似不願其有者何歟今葉子元禮之舉進士也則
兼有三者之美矣汾湖葉氏與吾邑及松江之上
海同祖石林今登朝者冠冕相望其祖自黃門公
以來聞人代出聲華燁赫諸父群從皆有才名乙
卯之秋元禮偕族弟淵發同舉京兆而從父大理

公有子復舉浙闈可謂極一時之盛顧元禮年方少而東南文士夙稱之姓名一似老蒼其家雖門第烏奕先世清白吏不名一錢蕭然四壁即以單寒之士處此亦不能堪元禮當之晏如是寧復有柳氏之慮元禮年未及壯而博習書史掉鞅詞場久爲名輩所屬目其文原本經術根據理要不屑爲一切干祿之文而自足以致當世之譽然後知葉子之以少年雋南宮也其才名足以自致其家聲足以無忝誦其文而知之矣憶前輩張素存侍講丙午校士兩浙已得元禮之叔星期而終以失

元禮爲憾予壬子歲典北闈嘗得元禮文與同年
蔡脩撰深賞之雖未果錄然心知其爲名士必售
夫文章遇合有時得失未嘗不可自決也以元禮
之年少多才與其家世即使不遽售將遂不有可
自決者乎因其屬予論次其文而并志之以見予
之知元禮不自今日始

憺園文集卷第二十二

憺園文集卷第二十三

序五

送姚僉憲撫蜀序

蜀素以繁富稱天下然其地踞溪山之險竊據時
有數被兵革地荒民流亦非一世若其受禍之慘
未有如明季者賊獻性嗜殺以擢筋咀肝爲笑樂
重以歲比不登虎鯨其類風挾火飛灼人踣道鋒
刃之餘靡有孑遺樹穿于屋草長于廩仕宦者以
爲非復人境 國家恩澤覆露三四十年間稍稍
係聚然猶人稀土曠空城故壘相望比叛者又從

而戕之雖王旅致討蕩平而向之稍稍係聚者復
流移失業矣是何異老穉之人嬰衰羸之疾其起
之不誠難哉

天子重憫斯土思所以撫循之會巡撫當代乃冊
僉憲姚公以往姚公起家成都推官改安化令入
爲給事忠謨謹論

天子雅知公而簡畀之況公有惠愛於蜀人所以
規畫措置以報稱

上心而大展其素所設施者講之宜熟矣予於公
之行顧有所亟望於公者竊效古人贈言之義欲

爲公一陳之子嘗備貢史局見前代採木之役爲
累於蜀人甚劇木之所產大都在窮崖洄谷宿莽
密箐毒蛭瘴霧不見日月人持糗糧巖棲露宿輕
則致疾重則蠲命深入生番之境又往往逢攻剽
劫奪其不死者幸耳其採之之艱旣如此其運之
之勞與費又不貲而木或尺寸不中程度輒棄前
勞而無償費見於前人之書甚著而歸太僕有光
所爲都御史李憲卿行狀及吾族祖嘉定知州學
周所條陳採木六難者言之爲尤切以今日之蜀
度之其難尤百倍於昔也公是行也其必請罷此

役令所司考明洪武永樂殿工事例原未採取蜀材亟宜別爲計議使民不蹈於向者之患而後所以拊循而安全之者可以次第措置甦蜀人之困事無有急於此者矣夫蜀固衰羸之疾也凡百治具如參苓諸上藥可以滋榮衛培元氣者其方不一若採木之役如烏喙之殺人不必羸病者而知其不能生矣於公之行而述所聞於昔者以爲告此宜公之所熟籌然復舉以爲言者以其事之不及待身履其地而知之也公其留意焉

送睢州湯先生巡撫江南序

先儒之言體用一源者其義亦明且著矣而世之論人者往往曰某公某公者體勝於用人也某公某公者用勝於體人也天下豈有離體用爲二者哉有體則必有用無體固無所爲用也昔明道先生之斥異端也曰因其高明自謂窮神知化而不足以開物成務考亭先生之上封事也曰必先格物致知以極夫事物之變使義理所存纖悉畢照自然可以應天下之務由二先生之言繹之蓋致其知矣反躬以踐其實踐其實矣舉而措之事業由是以致乎其極內聖外王之學豈有他哉惜也

二先生之道不行於當時其立朝之日淺無以致斯世於三五之隆然其任職居官立綱陳紀悅安強教世之以能吏稱者弗逮也明道先生初調鄆主簿令晉安皆以片言折獄僉書鎮寧軍判官排衆議合曹邨埽決口知扶溝得濱河惡少貫之使察爲姦姦者境無焚剽之患所至立爲科條旌別善惡恤孤糴釐姦僞民愛之如父母考亭先生之知南康軍興利除弊講求荒政爲學規引進士人講說其提舉浙東常平茶鹽也浙東方大饑始拜命即移書他郡募米商蠲其征未至境而商船輻輳

矣政有不便於民者釐革處事必爲經久知漳州
奏除屬縣無名賦七百萬減經總制錢四百萬土
俗崇信釋氏悉爲禁止所至以興學校明教化爲
本事二先生之所試者如此使其所試者大而所
爲措之事業者其止此乎有以哉宋史作道學傳
而數公者之政績一一書之也彼離體用而爲二
者不亦誣乎大中丞睢州湯先生固當世之爲程
朱之學而體用一源者也先生弱冠登科受知
世祖章皇帝官禁近已而持憲外臺所至歷有政
績能肅然整齊其綱紀於民有豈以強教弟以悅

安之實春秋方壯一與上官忤遂引疾乞休家居
二十餘年益涵養於存誠居敬之旨泊如有以自
守沖然有以自得也會

天子詔徵宏博之士大臣以名聞召試稱 旨於
是復入史館擢爲講官尋總裁史局

天子知其經術湛深令每日直講 內殿俄自庶
子轉內閣學士先生所爲密勿啓沃者非程朱之
言不以稱也會 廷推可巡撫江南者
天子歷簡在廷其難久之而先生遂膺 冊命親
承

上命者至再乃出江南士大夫之官京師者相與
歌舞以爲先生所反躬實踐以措之天下之民者
於是乃得竟其所設施而吾江南適蒙其福也某
於先生夙爲同官今則部民也其可以嘿而已乎
先生旣 陛辭將行爲援程朱二先生所爲任職
居官者以徵體用一源之義而又爲先生志喜曰
程朱所際之時所遭之勢有不可與先生同日而
語者矣程朱之蒙召見侍講筵爲日無幾方用薦
者入而旋以間者出出又爲小官而先生受

主上特達眷顧五六年間累遷至八座節鉞何其

榮遇之過古人遠也吾知先生之所建立亦必有
遠過古人者吾於同官之情則宜相與慶幸先生
之榮遇而於部民之誼則於先生所建立者厚有
望焉

送楊少司馬序

國之元老著功立名年及耆艾以養親予告 寵
命優渥比其行也士大夫傾城而送之此前代史
冊所不多見而朝野所謂至榮者然而其中猶有
不得已之情雖羨慕嗟歎於其行者有所不知而
同官相知之深者或言之而不能盡則千萬世而

下又孰知當時君臣相遇之難而其得之可幸也
國家定制仕宦無兄弟及兄弟俱在仕籍者例得
歸養今少司馬楊公前以才望簡撫黔中時太夫
人年已七十餘公思念不置凡再疏請歸

天子以巖疆新復非公無與彈壓者嚴命畱之遂
不敢固請繼召佐邦政置傳來京公協理維勤
軍政脩敕中外選建措置合宜輒欲以間申其情
事而

皇上方銳意太平三事大夫罔不凜凜奉職圖稱
上旨則又依違者久之常望南天白雲屏處獨獻

賓客謙從皆爲感歎旣而曰吾不可以濡遲矣乃
上疏言臣以無任蒙

皇上異數拔擢洊至卿貳雖糜踵頂無以仰報萬
一顧臣母年八十有四病卧牀第臣兩弟一爲縣
某處一在家錮疾淹廢而臣犬馬之年亦六十矣
自出撫貴陽不見臣母面一十六年起居遠隔飲
食湯液之奉無由躬親是臣母雖有子而無子也
臣日夜悲念精爽飛越雖欲竭誠以報

皇上其道無由特乞俯憐烏烏至情許臣歸養終
母天年臣不勝惓切疏甫入而賜歸之命下矣蓋

皇上雖不忍遽釋公以歸而不得不奪於以孝治天下之意故俯從公志曾不崇朝而諸大僚皆莫得邀此異數則公之得遇

皇上於此時可不謂至難至幸者哉此予所謂不得已之情他人所不能知而予知之獨深者則於公之是行也其得已於言乎公返子舍自今以往母子相依百年之日則皆君恩之所沾濡而寵被者也聞其事者忠臣孝子之情可油然而已

送大司寇魏先生致政還蔚州序

蔚州魏先生之得請而歸也崑山徐某往送之先

生曰獨無一言贈我乎余曰有懷之久矣昔夫子
蓋嘗歎未見剛者而以和而不流中立而不倚爲
君子之強豈非以意氣偏黨之私與伉直求名之
病於剛德猶有歉焉者哉自古處臺諫之職者伏
蒲攀轅代有其人前明時尤以矯厲風節相矜往
往爲一人一事而詰責罷免詔獄廷杖死徙相屬
言者卒不已此其爲清流正人固無可疑議而激
於意氣涉於近名者或亦有所不能免也此夫子
所以不輕許於申張子路者也而況三代以後之
人材不得聖人爲之依歸以涵養其德性而克治

其才質雖以漢之汲長孺唐之魏鄭公論者猶不
能以無遺憾又況於其他邪若夫學粹而識精體
全而用鉅上而君父下而斯民不能不致其惓惓
者是道德之士無所爲而爲之者也間嘗指數三
四十年間清流正人爲當世所稱道者不乏其爲
無所爲而爲之者先生一人而已矣昔者先生以
光祿家居鍵關讀書十餘年所講求者存誠主敬
躬行實踐之學若無心於當世而以執政推轂乃
起其或出或處一於義而無適莫與人交謙恭平
易恒自以爲弗若人其於意氣偏黨之私澄汰淨

盡亦已久矣若其立朝之概如喬嶽之作鎮如砥柱之障瀾所言皆國家大計他人之所不敢言
儉夫穢吏望風惕息雖千百世之遙聞其風者亦將頌廉懦立恨不與之同時固無俟乎予之稱述矣顧讀著夫學問之所自得使後之論者知夫先生之爲有德之言仁者之勇有合於夫子不流不倚之旨爲天德之剛而非徒以矯厲風節見也
天子名先生之堂曰寒松至親灑宸翰以賜知臣哉夫寒松之貫四時而蒼然獨立於雲漢之表不以霜雪雨露而改易菀枯者豈有所爲而然哉

先生曰不敢當雖然是吾心也乃書之以爲序

送王阮亭奉使南海序

今

天子神聖英武芟薙僭亂方夏寧輯爰以季秋之吉車駕發京師省方時邁詢民疾苦始自齊魯南涉江淮所過泰山闕里及鍾山明太祖陵

天子親臨鹽薦又稽之古制分遣卿貳告祭天下名山大川少詹事阮亭王先生奉命往祭南海行有日矣友人具官某送之作而言曰古者望於山川第一時望祭之未嘗分詣其地唐開元中始

令左丞相裴耀卿等分祭五嶽四瀆其後輒遣專
官肅將祀事然或雜以祈禳非古帝王懷柔百神
之意我

皇上愛養黎庶敬恭明神寰中之大莫如海而祝
融之神奠綏南服頻年戈船橫海之師著有顯績
窮島絕壑咸入版圖其有功於國家最鉅況廣
之爲州越在五嶺外瘴癘之區道里遼遠德教難
究比盪定後百姓雖復舊業貪墨之吏朘削如故
天子赫然震怒更易節鉞大臣以慰安鎮撫之其
地尤爲廟堂所注意先生學問該洽器局弘偉

茲行也不特奉宣明德昭報神功而已其山川形勝風俗戶口吏治之臧否民情之樂苦二歸報

天子以助施政教雖以

乘輿七萃所不能至者

儼如

親蒞其地而燭照萬里之外此先生奉使

意也若往時祝釐之役陳禎符而稱美瑞知先生不屑爲也粵故多佳山水羅浮西樵諸勝皆在焉先生每遊屐所到長篇短詠山川生色嶺南又多佳士暇日且攜之登臨唱和還轅之日解裝而出其橐中所得者爛然成編當更爲先生一序之

送張敦復學士請假還桐城序

往予爲敦復張公作四軒圖記大意以公處講
幄論思之地當今

聖人學有緝熙所資於啓沃者非尠且深宮之中
神幾默運以制勝萬里之外公日侍內庭仰見憂
勤庶務與民同患之意臣子未可以私情上請故
予以爲龍眠四時之景物雖佳公望之如蓬萊方
壺殆未得徜徉恣肆於其間也所謂四軒圖者直
以卧遊云爾重光作噩之歲滇黔底平海內無事
保定孔固頌聲作焉其明年春公乃請急歸里營
其親之窀穸

天子既俞之又手詔賜以白金文綺殷勤慰諭許
得卜宅兆訖事而後還 朝於是公治裝南行過
子道別子曰公公今得遂其歸矣計公到日已及春
深由是而徂夏入秋涉冬以其卜兆之餘而少憩
於其間以休其上下瞻相之力則夫四軒者可以
遍歷之以遂其夙昔之懷思矣雖然庸遂得徜徉
恣肆以極其樂也邪公朝夕侍奉 講幄者數稔
於茲一旦言還乃心未嘗不在

天子左右也

天子之所以眷注於公者渥恩溫語欲其慎成篤

終之禮而式遠其行也則夫四軒之景物又豈能久戀乎予所以復理前說以贈公之行也

送孫古喤之官南靖序

嘉善孫古喤以辛丑中禮部試入對太和殿公卿大臣讀卷者咨嗟歎賞謂當以第一人及第俄置二甲第一例應除府推官需次未即授久之廢推官改爲縣令又久之乃得福建之南靖於其行也京朝士大夫爲詩歌以送之旣以寫其離思且惜其才之當在清要而屈於小縣而古喤驅馬出國門將走六千里以適濱海炎瘴之地意無不

自得者方古嗶爲舉子即以今古文辭負東南盛
名長身脩鬚清姿四映四方人士望之若神仙其
旣釋褐也待命闕下及在里門凡十有二年同
時之進士高第者駸駸乎至列卿矣而古嗶方授
一縣此其間若有天焉然吾考唐宋以前因人予
官不以官限人於時進士必授外職試以民事其
知制誥脩國史多擢久歷內外者故得盡其用自
有明始選吉士入翰林而劉忠宣時雍嘗請於朝
廷願爲親民之官蓋有經世之志者以爲優游詞
館未足有所設施故欲得親民之吏以自效假令

古噍生於唐宋時即不如今之需次淹久其必由
州縣以歷臺閣無疑也古噍於世務無所不通自
拜褐以來揣摩吏事又甚久南靖爲漳州屬邑八
閩重兵駐漳者爲多其民素苦徭役而芻糞糧
之儲備於縣令是問他人跼蹙不能自振者古噍
必辦此有餘他日政成報最蒙不次之擢以廻翔
於禁近清切之職皆於南靖爲始基焉天之所以
成就古噍與古噍之表暴設施者於是乎在宜其
不以屈於小縣爲抑鬱也予與古噍交久且善也
述而誌之以爲序

送施少參尚白還宣城序

仕止久速君子之所不能必也而一聽於時之自然故無往而不自得者然而孔子之將去衛及還原息陬也作丘陵之歌則曰維以永歎涕實潏潏作槃操則曰慘予心悲還原息陬徘徊去畱之間若戚然不能釋者豈聖人有所不安於時哉此皆性情之至而發乎其所不容已也人生所常涉歷之處及常相見之人驟與之別未有不黯然神傷者況官於其地與父老子弟相親恤至於數年之久者哉江西參議宣城施先生分守湖西七年度

朝廷裁省天下監司官當去趣裝將行湖西士民攀車涕泣者幾萬人既至章江重繭追送先生亦重念湖西人若愴焉不能釋者予聞湖西人言先生事最悉先生駐節臨江府府城久壞距蕭江數武屢築輒潰先生禱於城隍之神越明日城成新塗峽江多虎患太守高培請先生爲文禱於山川神祇居三日有虎自墜深谷村人殺之以告自是絕無虎害歲旱禱雨先生徒跣走南郭門外伏雲壇下呼天痛哭俄有一人發狂叫號言某日雨及期雨果大至先生所轄諸郡並有講堂書院一日

親臨講學有新淦人兄弟閱牆者聞先生言相持
大慟詣階下服罪廬陵諸生有同父兄弟爭產者
亦感悟友愛如新淦人先生以至誠通神明感人
心者類如此以故湖西之人聞先生行悲慕之不
已而先生視其部人若手足肢體疾痛疴癢之無
不關也故不以名位沈滯爲憂而以己之旣去湖
西之人將無復噢咻之者宜其愴然有所不能釋
已予又聞先生之署剖竹爲亭曰就亭爲屋傍木
芙蓉曰芙蓉屋爲樓曰愚樓平昔所游處也青原
鷺洲書院先生講學之地也固嘗與賓朋佐吏國

人子弟笑語談論於此凡皆其所不能一日忘者也先生還宣城當需次除官且數年徜徉於敬亭黃山之間以順時而動明先王之道以興起其鄉人徐而擴乎天下仕止久速固無往而不自得者予見先生重念湖西人特爲之推明以見天下繫意爵祿者本不足論即決然以去有膜視吾民之意者亦非聖人之徒也於其行述此送之

賀張南溟擢左副都御史序

歲甲子某月左副都御史缺

上特擢右通政丹徒張公任之

命下舉朝胥慶

而吾江南人尤喜正直之得庸風紀之克振以是
爲鄉土光爰相率徵文以爲公賀予辭讓不獲則
書以進之曰惟黃門省之與御史臺實相表裏者
也省主封駁臺主糾察朝廷政令之得失人才用
舍之當否廷臣議之兩省皆與也公昔在諫垣竭
誠盡職凡國家大政事知之必言言之必盡每面
奏封事趨入螭坳

天子數改容待之所言輒蒙報可 特簡內升再
遷京兆陟處霜臺

上之所以簡畀者蓋默鑒已久也先儒有言都察

院之職在於正己以正百僚必其存諸中者上可
以對君父下可以質天下士大夫而後百僚則而
象之大臣法小臣廉紀綱之振飭於是乎在公魁
貌長髯音吐弘暢自其爲閣舍時出入經殿門廻
翔容與行止不失尺寸人已指而異之迨居比部
剖決無留牘黠胥老吏莫得容其私升堂受質選
言而發神采奕奕雖諸老亦不敢以僚屬相待也
今公且躋崇班峻秩駸駸乎秉鈞衡而管樞軸也
此所以重有慶於

聖天子之知人善任也獨是區夏乂安之時與向

者邊陲未靖之日又有不同者嚮者三方草竊烽
檄四馳事無大於用兵籌餉而公所建白動適機
要多見施行則公之所已言者其爲利固已溥矣
今小醜既靖武功告成

天子方弘制禮作樂之事鑒觀四方求民之瘼於
是時而當是任所以振綱維肅紀度者必使朝宁
無不究宣之德意遐幽無壅闕之隱情明目達聰
獻可替否以贊久道化成之治然後足以報稱
天子之所以簡畀也公嚴氣正性從學問發爲材
猷至今公退之餘日手一編不輟又與其賢從宗

伯公悉心考論以精之宜其所蓄積者之愈以深厚而所發揮者之必有元本也吾知

天子且遂大用公而公之道將大行而其澤且被於天下後世稱之者不質言其姓氏而系之於所產之地斯其爲吾鄉土之光者又何如也

送中書舍人汪君序

人之最願者康強無疾形充體悅神葆而精固而其最不願者疴羸疾苦嬰於其身故無疾之人忽語以疾則怫然怒而苟其有疾亦必憂愁抑鬱若桎梏之貫體惟恐不脫去也獨今之士大夫不然

仕宦不適意其私情有所避與就無故輒自移曰
疾而都大官享厚祿者雖其有疾黃馘而僂行跛
曳而踰闕甚且喘呻牀第之間而終不月輕以疾
告嗚呼疾之在人顯而易見非如學問心術之不
可知也而其有與無難定如此吾嘗靜而觀之彼
有疾者詭爲無疾其害於心大矣若無疾者自詭
爲疾不過以仕宦之不適意使其一旦居高位則
雖有疾而貪戀瞻顧當必有甚焉者其害於心抑
豈細乎老子曰兵莫憐於志莫邪爲下人知有形
之疾而不知無形之疾有形之疾時其起居節其

養飲已爾無形之疾中於人心而發爲世道之禍固非俞跗之能療而藥石針灸之可施也斯其痼疾已乎中書舍人李用汪君居京師三載勤於其官會當遷忽移疾去蓋君有親在堂年高矣欲見其子甚君用是憂思成疾急請於朝棄其官而歸吁觀君之疾其諸異乎今士大夫之疾矣人少則慕父母仕則慕君不得於君則熱中熱中之疾得失交攻於前愈進而愈無厭故已之爲難慕父母而疾則得見父母而疾已君今歸服其命服拜二親於堂下擊肥烹鮮手捧一卮爲壽一家之內

優游恬愉和氣充塞我知其霍然而起無疑也人或
有以疾勞君者則應之曰昔者疾今日愈其亦可
乎嗚呼必人人如君之疾者而後可以事親可
以事君也歟

送熊遜脩侍讀歸養序

吾師孝昌先生往居政府忤俗罷歸奉太夫人僑
居金陵者十三年菽水侍養至樂也介弟遜脩告
歸定省亦有年

上垂問者再四遜脩乃出補官去年典試浙闈
特召至別院慰遣之恩數有加其還也於諸典

試中最高爲稱 旨

上嚮意欲大用之比者

上旣以大宗伯起先生於家不踰時而遜脩以養
母陳情疏畱中三日

上語執政曰熊某品行端方學問醇正廉介自守
不事交遊翰林中最難得朕不忍令去但母子至
情難拒其請遂下 溫詔許之一時知與不知皆
服遜脩之去之果而子以爲此去也固非讀書明
義理之君子所難而獨奈何其果者之少也且彼
亦未知夫君子之所以欲仕也孝經言立身行道

揚名於後世以顯父母爲孝之終疏引孔子對哀公名謂之君子之子是使其親爲君子也此則揚名榮親也世之自以爲顯揚者吾惑焉諺曰仕宦不止車生耳夫彼特以尊官厚祿爲名耳而豈知君子之出處必以其道乎苟非其道則名亦非名矣經又言始於事親中於事君終於立身鄭氏以爲父母生之是事親爲始四十強仕是事君爲中七十致仕是立身爲終也古之君子仕宦不出於其百里之國故禮有縣車釋政老而傳子而無去官以養其父母之文蓋北山之詩以行役而不遑

將母是其暫耳猶且作歌以來諗今天下一家海
內之士或從官於京師或分職任官於四方而有親
老不能就養無他子在側者許其告歸著在令甲
上方以孝治天下凡以是告無不得請者豈以讀
書明義理之君子而猶戀此一官濡滯不決邪夫
精白乃心以報國家酬知遇者必不出於希榮干
進之徒也明矣遜脩旣以學行爲

天子器重其歸也必益砥礪以答 恩眷蓋古所謂
資父事君如是而已吾師爲 國宗臣荷

上厚恩義不可以不起遜脩則義可以去或出或

處各以其道其遺親令名豈有窮哉於其行也書以贈之

賀漢陽吳公入內閣序

今上御極二十有一年漢陽吳公以大宗伯受上簡陟台輔朝野相慶以爲得人而公先世故新安籍也於是江南士大夫官於朝者謀合辭賀公屬言於某某以後進辱交公久不敢以不文辭乃爲之序曰古稱相業者有賢相有才相賢相者才與德兼而不見其才者也國家設官內自九卿百執事外至郡縣牧守長令皆有分職則皆可以

才見宰相不必見才職在順陰陽宣聖德廣教化
總持大體而已間考史冊漢唐以來宰相以才見
者收攬威斷綜核名實一時未嘗無赫赫可紀之
功而或陰賂元氣或冒震主之嫌跡其始終功名
之際不無遺憾若夫所謂賢相其踐馭久其諳練
深歷之於中外試之禮樂兵刑以成其名樹其望
而及其致位尊顯則又能斂其剽鯨剽劇之才以
老成持重當天下之大任聲色不動而恢乎其有
餘地焉古大臣類如是故方其未用天下即以公
輔期之一旦枋用則皆以爲宜吳公當

世祖皇帝時由翰林出爲監司所至有惠愛久之
以卿貳內召

今上初歷官刑部侍郎請讞精明以艱歸服除遽
詔起兵部督捕侍郎督捕專理八旗號繁劇公治
之有聲尋遷禮部尚書明習典禮熟本朝故事
上甚重之及大拜輿論翕然蓋公自通籍迄今敷
歷中外三十餘年其公輔之望信於天下則已久
矣公操履清嚴斷斷辨義利自奉蕭然若寒素然
坦易不喜立皦皦之名即之溫恭和藹其尤難者
性醇厚遇事力持大體深得古大臣風昔曹參丙

古漢賢相也其功業可紀者必多然史遷稱參惟
曰清靜寧壹班掾傳吉亦僅載其不案掾史問牛
喘數事以爲知大體二子者豈舍大而取小節哉
大臣之體當如是耳方今六寓一家天下號太平
無事然而水旱未盡調小民怨咨未盡釋咎在守
令競爲苛細務腴剥不能體

天子休養元元至意故民受其病然則率之以惇
大劑之以寬仁所以順陰陽宣聖德廣教化於公
能無望哉嘗讀唐宋宰相表六七百年間列名簡
冊以數百計而姓氏章章至今學士大夫稱道慕

說者僅數十人焉公異日功名藏之太常行事書之史冊令學士大夫稱道慕說列之數十人中曰本朝賢相吳公其一也是則國家之慶而區區桑梓之私固不足爲公道也矣請以予言質之公遂以爲賀

憺園文集卷第二十三